



Fasnacht 2006

Sujet: **V**erhinderigs **C**lub **S**chwiiz

Es git in de Schwiiz en Club s`isch nit zum Glaube  
wo eus ziemlich die letschte Närke duett raube  
de Club macht Isproche mal für mal  
und findet sich au no genial

Agfange hets im St,Jakobspark  
das sig lut VCS en riese Quark  
vor allem heg`s dört und das isch lätz  
für d`Auto vielzviel Bsuecherparkplätz

Mir z` Prattele chömet ganz bsunders dra  
stönd doch bi uns de Media-Markt und IKEA  
beidi händ scho lang ganz Grosses vor  
beidne stoht dank em VCS no e Wartezeit bevor  
dr IKEA darf nonig grösser werde  
wege dr laufende VCS Beschwerde  
dr Media Markt het au nonig neu baut  
das het ihm au dr VCS versaut  
e Beschwerdegrund sind Anzahl Parkplätz wie immer  
aber Achtung es chunnt no schlimmer  
lut em VCS sinne Gedanke  
würd me zwenig an d`Umwelt denke  
will den gits au me Verkehr  
und alli chöme mit em eigene Auto vo überall her  
drum findets dr VCS gar kei Saich  
es Paket vo Massnahme im Verkehrsbereich.  
als erschts muessme d`Belastig für d`Umwelt messe  
denn aber chunnts ganz dick , und vo dem isch de VCS besesse

me muess im Grüesse de öffentlich Verkehr neu plane  
drum ghöri dort d`14 er Tramlinie anne  
und am beste genau und exakt  
im 7 und 11 Minute Takt  
und will nit alli Chunde dient Auto fahre  
will dr VCS nit mit Idee spare  
duesch es grosses Möbel poschte  
wo jo im IKEA nit viel duett choschte  
wirds heibrocht ,man staune und höre  
will en Huuslieferdienst zum Service sött ghöre  
d` IKEA luegt dem Spiel nüm lang zue  
will endlich baue und ihri Rue  
duett das nit passiere, oh du Schregg  
hauts d` IKEA vo Prattele weg  
denn sagemer: „, Merci VCS bisch famos  
dank dir wieder es paar hundert Arbeitsplätz los“.

Au im Migros-Schönthal so hemer verno  
würdis anschienend dumm ergo  
händ eigentlich welle es Umbauprojekt starte  
müend aber dank em VCS no chli warte  
d` Migros hätti das isch zum lobe  
für de Umbau 45 Parkplätz ufghobe  
doch am VCS goht das verbi  
die chömet mitere neue Idee  
d` Chunde solle ab de erschte Minute  
für en Parkplatz zwei Franke buttere  
wird dr VCS mit dem vor Gricht durecho  
duett Migros de Umbau falle lo.

Zum Schluss no öbis in eigener Sach  
mir halte das Joor Wagemässig de Ball flach  
findet ihr euse Wage isch nit ganz fertig so händer Recht  
will au bi uns het dr VCS bim Wagebau e Isproch gmacht  
jetzt hoffemer er duett kei Beschwerde gege d`Fasnacht versueche  
sunscht heisst`s den „, Statt fahre .. Laufe liebi Dorfplatzrueche

